

第一七六冊

方輿彙編

職方典

雲南總部

雲南府部

(卷)

一異

一異

古今圖書集成

中華書局影印

古今圖書集成
目錄

卷一
目錄

古今圖書集成

中華書局影印

欽定古今圖書集成方輿彙編職方典

第一千四百五十六卷目錄

雲南總部藝文二

疏通邊方河道議

明毛鳳韶

南金沙江源流考

張機

北金沙江源流考

前人

滇南賦

俞緯

滇中茶花記

馮時可

雲南總部藝文三

送李宓雲南伐蠻

唐儲光義

賀李宓伐蠻歸詩

高適

西蕃箚

元張翥

送楊耀卿使雲南

李材

雲南詩

明史公謹

賦得滇池夜月

郭文

滇南即事

沐璘

入滇二首

張時徹

登滇城觀兵

張佳印

送黃侍御申按雲南

李攀龍

送周憲副之雲南

吳國倫

送莫文孝滇南典試

前人

送段虛舟還滇

嚴清

滇海曲八首

楊慎

春望三首

前人

寄滇南諸人

平顯

寄滇中友人二首

前人

滇南七夕歌憶升庵楊公因寄三首

井芹

昆明池歌

朱曰藩

雲南總部紀事

雲南總部雜錄

雲南總部外編

職方典第一千四百五十六卷

雲南總部藝文二

疏通邊方河道議

明毛鳳韶

竊照雲南地方有水路直抵四川馬湖府初以遐僻為禹跡所不到遂為土人所據至我國家始設郡縣其地同於華夏然貢獻之物損官使之行李軍民商賈之物貨擔負萬里筋力已疲而土官土舍因見道路阻絕每懷異志及今國勢強盛不行開道將來之悔不敢謂無也本道訪據武定府揭帖內開本府有迤東通四川水路自雲南海口至安寧羅未富民只舊徐革達吉普渡河安革法干土色至大江俱本省地方大江至四川東川地方大江邊阿納木姑共一十三站內土色有疊水又有迤西通四川水路自雲南陸路至富民武定虛仁環州至金沙江巡檢司凡五站本司金沙江水路下船至屬刺母白馬口燦刺則五曲革直勒則卓刺除魯圭寧抄答甸沙吉撒麻村亦至土色大江阿納木姑凡一十四站內則卓沙吉有疊水等情又據金沙江巡檢司應襲巡檢土舍

李朝宣稟帖內開金沙江上至麗江瀾滄至姚安府武定府下至東川烏蒙芒部上江弘治正德間馬湖府安監生放杉板嘉靖十七年王萬安亦放杉板俱係拖梢五板大船經過或十餘隻或八九隻建昌行都司奉欽取大木寧番越嶲鹽井建昌等五衛俱在上江打冲和三江口并德昌千戶所地方或割算或散放會川衛在下江科州採所查審開江船行若問灘水險阻魯開虎跳灘天生橋十分不為險阻等情又審據本府姜驛驛丞梁松稟稱本驛設在金沙江巡檢司之西過江五十里與四川會川衛抵界每見客人來販木割成篋筏自本司江流而晝夜六日即抵馬湖隨算下船或一二十隻裝載糧食有養猪畜客人跳篋擲船如履平地離本司江下五十六里有大小虎跳灘係是沙江至冬春水落之際可以施功開鑿等情又據本府揭帖內開提經過建昌客人何松執稱建昌衛管下德昌守禦千戶所洗迷村伐木下江頭一程至白水站一程至會川衛管下甸沙關甸沙關一程至梅易千戶所三程至武定府和曲州金沙江等情隨喚何松亦稱馬湖建昌等處客人採取大小板枋俱自德昌下河從金沙江巡檢司經過直至馬湖叙州令伊畫圖各到道為照前項河道武定迤東極為捷徑且甚便益但訪得河內間有蠻尖石兩邊岩石生合成橋水從石縫流下未委虛的若迤西金沙江則水面洪闊四時橫流客商通販前後不絕中間雖有虎跳二灘然皆沙石易鑿此則斷然可通而無疑者也先年巡撫都御史黃衷曾議開修取金沙江巡檢司曠愛招集馬湖橫江客人俱到布

政司舉行間以陞遷中止近年巡撫都御史汪文盛亦會委官踏勘以征南中止事功之會人咸惜之合無批行總司會同布都二司從長計議先將東西二道各委能幹文武重職帶同屬官多給官銀督同本處土官土舍俱優其廩給帶領木竹石鐵等匠厚其口糧衣鞋沿途用銀雇倩熟知地理鄉導人役隨帶小艇及沿河採買竹木劉爲簞筏乘載通行逐處踏勘直至馬湖大江而止中間要見舟楫無碍徑行者幾處危石可擊者幾處幾丈尺如有絕險人力所不能施者或作兩截盤運沿河陸路可通者幾處不通者幾處應合開闢者幾處幾里幾十步及沿河有無人烟稀密堪立驛遞鋪分哨堡等項各計合用夫力工匠若干錢糧若干悉心料理勘估明白畫圖帖說井將用過官銀具繇造冊回報然後擬議奏請行委三司堂上官親詣督理開通施行則不獨一時一方之利實國家久安長治之計也

南金沙江源流考

張機

按大金沙江發源崑崙山西北吐蕃地即夏禹所導黑水也雖與雲南小金沙江及瀾滄諸江皆發源吐蕃然大金沙江之源較三江最荒遠且其源與三江源迥不相近其下流亦十倍小金沙江及滄潞二江之外按禹貢華陽黑水惟梁州黑水西河惟雍州周文安辯疑錄云甘肅志甘州之西十里有黑水流入居延海肅州之西北有黑水東流遐遠莫窮所之是其源入雍州之西流入梁州之西南其正西別流遠西極之外而無所據見地勢西北最高故能經西而西南也雲南志載金沙江出西蕃流至緬甸其廣五

里經趨南海得非黑水源出張掖流入南海者乎河源在中州西南直四川馬湖蠻邦之正西三千餘里雲南麗江宣撫司之西北一千五百餘里愚觀黃河源近雲南地則大金沙江源自番雅之地南入緬海論雅梁間水惟此大耳此水爲黑水無足辨矣朱子云天下有三大水曰黃河曰長江曰鳴綠江此語無怪也宋初斧書雲南南渡又偏安一隅朱子又從何知有此江之長廣於江河哉黃真元又云考大金沙江瀾滄三水雖皆入南海大小遠近迥不同瀾滄露四分之一大金沙倍於瀾滄瀾滄所出地名在鹿石山在雅望俱可窮源上流亦狹大金沙江之源則遠出番域上流已闊澄若重溟黝然深碧夏秋漲溢江色不變若比於揚子浪滄一小溪即詩語大金沙江之長廣又可知矣其注云旁多松有琥珀自孟養地來孟養正在金沙江之濱今瀾滄不聞有琥珀大理志指瀾滄爲黑水亦不深考耳相傳大金沙江上源近大宛國自里麻茶山至孟養極北不聞有所往號赤髮野人境峭壁不可梯繩弱水不任舟楫土人惟遠見川外隱隱有人馬形似殆西羌之域也今始略其源惟自其經流支流入海可見者言之水流至孟養陸阻地有二大水自西北來一名大居江或云大車江一名檳榔江二水至此合流又名大盈江今騰越州人總甸內諸水亦曰大盈江殆竊侈其名也江流至此彝人方名其爲金沙江江中產綠玉黃金銅子金精石黑玉水晶間出白玉濱江山下出琥珀舊志以琥珀綠玉出瀾滄江者謬矣昔年王靖遠將定西追麓川叛賊思機發思卜發弟兄造船飛渡孟養

及復與思祿盟誓江乾石爛乃許其過江者皆此江也滇人相傳名大金沙江若以別麗江北勝武定馬湖之小金沙江耳自此南流經宜猛莫嘍莫郎至猛掌有一江西來入大金沙江又南下昔村怕鮮猛莫猛外經蠻莫有一江源自騰越大盈經鎮彝南甸千崖受展西茶山古湧諸水伏流南牙山麓出經蠻莫入大金沙江江又經蠻法魯勒孟拱遮龍管屯大菴蒲山峽小菴蒲山峽課馬孟養怕崩山峽戶董鬼哭山憂撒昔年緬人攻孟養以船運兵餉到憂撒爲孟養所敗者此江也正統中蔣雄率兵追思機發爲緬人所壓殺於江中亦此江也大約江自蠻莫以上山聳水陡正統中郭登自貢章順流不十日至緬甸者亦此江也下流經溫板有一江源自騰越龍川江經界尾高黎共山隴川猛乃猛密所部莫勒江至太公城江頭城入於金沙江下流又經猛吉準古溫板又名溫板江溫板又名流沙河皆金沙江也猛憂馬噠喇至江頭城江中有大山極秀聳山有大寺又有一江源自猛辦洗母憂南來入大金沙江又經止即龍大馬革底馬撒騰馬入南海其江至蠻莫以下地勢平衍闊可十五餘里舊志云五里者非也經南江益寬流益漫緬人善舟又善泅水操櫓楫者如涉平地至是江海之水漸爲一色矣文選載佛經云拔提河一名金沙池脫履金沙云云金沙江亦名拔提河矣今再附考蒙化府志瀾滄江與漾濞江蒙人謂之二江合西洱河勝蒲河至順蒙交界處土人謂之羅擦聚日出水光蕩射可觀不二十餘日至錦龍江即水下流海客船多會易於此漸漸至南海永昌府志潞

江一名怒江水經注云漏江楊慎云漏江今說爲潞江源出吐番流經芒市至木邦地名噓哩江又流經八百車里地至擺古東入南海自木邦以下即可通舟楫昔年隴川多士寧潛往擺古見莽瑞體皆繇此江順流而下也舊傳潞江流至洪門車里沙磧浸散與近騰越志以爲入大金沙江皆非是愚嘗謂三江皆可舟可航彝人欲據險隱塞不使通行豈知天地設此三江正爲朝廷制取西南緬甸諸彝設當事者誠不可忽而不講求也異日聖天子問緬甸諸彝久不朝貢之罪則此三江者固漢家樓船下番禺出奇制粵之牂柯江也

北金沙江源流考

前人

按金沙江源出吐番共隴川犂牛石下謂之犂牛河亦曰犂水訛犂爲麗又名麗江即古麗水以其江產黃金故名金沙元憲宗取大理用革囊以濟者即此也其流經吐番鐵城橋東經麗江府巨津寶山二州又東經鶴慶府北勝州姚安府又自武定府北界經黎溪州蒙氏僭封爲四潰之一亦即此江也又自武定下流入濟慮部彝人鑿桐槽船以通往來行旅遂名金沙渡又西過四川東川府一名黑水一名納彝然皆金沙江別名又經四川行都司會川建昌德昌打衝等衛所又經烏蒙府又經馬湖府蠻彝長官司與馬湖江相合下流至叙州入岷江矣今自其支流者言之大理賓川大江北入金沙江鶴慶漾共江東南至龍珠山入石穴伏流復出金沙江三莊河與漾共江會流入金沙江北勝州桑園河經州西南桑園村下流入金沙江龍潭泉有九眼下流入金沙江程

湖南入金沙江姚安府蜻蛉河西經大姚縣東入金沙江龍蛟江一名苴泡江合姚州連場香水二河入金沙江安寧州螳螂川即滇池所泄下流潞迴州治上過昆陽州下經富民縣入金沙江楚雄府龍川江西合諸水爲戛峨川又東合諸水經定遠縣黑鹽井下流入金沙江考安寧楚雄二水雖小可通舟楫武定府西溪河經楚雄府至元謀縣西入金沙江又勒彝水普渡河俱入金沙江以上皆雲南之水朝宗於東海順流於中國者四川東川府牛欄江源出尋甸府入金沙江辟谷川源出尋甸府白津河西入金沙江越嶲衛大渡河源出吐蕃下流合馬湖江四川行都司寧遠河西南合瀘水入金沙江懷遠河南合瀘水入金沙江鹽井衛越溪河東合打冲河入金沙江雙橋河流經打冲河入金沙江會川衛瀘古河河出小相公嶺入金沙江打冲河千戶所打冲河蠻名黑惠江又名納彝江源出吐蕃下流入金沙江冕橋千戶所東河源出小相公嶺會瀘古河入金沙江四川行都司南瀘水源出吐蕃南入金沙江元史云水源廣而多瘴鮮有行者春夏常熱可燂雞豚諸葛武侯五月渡瀘即此水也元李景山云益州記水經俱以瀘水在未昌不韋縣寰宇記以爲在嵩州會川縣景因出使越嶲考瀘水源蓋建昌瀘川驛有孟獲城又有瀘古州孔明渡瀘絲綸州入益即滇池此名渡瀘有驗今水出吐蕃過建昌會川合金沙江夾岸多高崖叢葦故下渡如經帆釜炎蒸抑鬱多感瘴癘至今猶然或以金沙江即瀘水誤矣雲南之水迤東可通中國者如雲南府大城江自陽宗明湖經宜良入

盤江臨安之瀘江曲江發今江入盤江歙江府之盤江鐵赤河入盤江廣西府之八甸溪入盤江盤江至府境水爲大曲靖府之瀘湘江白石江合盤江經交水至彌勒入平伐橫山寨下經廣西靜江入于海廣南府西洋江入廣西田州府右江南汪溪亦入右江尋甸州阿交合溪入霑益州界北在經理廣西田州水陸者安可忽之哉如大理府西洱河下與漾濞江合流入瀾滄江漾濞亦名神莊江瀾滄江源出吐蕃自西而南至麗江蘭州雲龍過永昌楚雄臨安車里大甸七十城門至交趾入海趙州白巖臉江一名赤水江下流至定邊名禮社江瀾滄江臨安府西有禮社江入納樓茶甸界爲祿豐江經合蒙自爲梨花江注于交趾清水江楚雄府馬龍江源自蒙化境由定邊礪嘉合白巖臉江南入元江景東瀾滄江大河源出定邊入馬龍江景東府杉木江馬湧江合南浪江入威遠州界末寧府羅易江北過府境勒汲河入四川鹽井衛界順寧府備溪江西洱漾濞二水合流至本府鐵場山下入瀾滄江故名元江府禮社江一名元江源出白巖臉江合瀾滄江諸水入交趾新化州摩勒江即禮社江下流至元江入交趾者樂甸長官景東河源出景東經本甸下入馬龍江北勝州羅易江入末寧府白角河入西蕃界末昌府瀾滄江銀龍江入瀾滄江勝備河入備溪江路江一名怒江經芒市木邦八百下流爲噓哩河經擺古入南海檳榔江出吐蕃遠金齒百彝經干崖阿昔下合大車江至江頭城騰越大盈江一名大車入南甸爲小梁河至干崖爲安樂河西流爲檳榔江龍川江下流至緬甸

太公城合大盈江雲南府安寧河出安寧經富民羅次爲摩沙溪至祿豐爲大溪至易門爲九渡河入元河又星宿河出武定經祿豐過易門入元江蒙化府陽江出郡西北甸頭花判溪南至甸尾過定邊與迷川禮社江相合過元江入海瀾滄江與漾濞江蒙人謂之大小二江至順蒙交界處土人謂之羅擦聚二水相交日出水光蕩射可觀不二十餘日至錦龍江一名九龍船行會海客於此漸至南海恩謂雲南通緬甸諸彝水路舊惟知有金沙江可通大舟不知潞江墮哩一派可通擺古瀾滄銀龍一派可通八百交趾皆可舟可船之水經理緬甸者誠不可不講求也故附及之

滇南賦

俞緯

滇南草木子嘗慕司馬子長之遊恨其時初事南服心憂體倦役目騁耳未足盡其大觀也慨然言於西蜀石潭先生曰夫人居勝地則其志朗其御遠處偏安則其中偏其氣索此牽乎地者也又讀帝系舜以諸馮而繼命西伯以岐山而造周爲之而已曷與地謀此係乎人者也先生以余歎處滇者乎請誦所見聞而先生就正焉夫滇之處絕鎮也地衍西南之域天文井鬼之分肇自巨唐宅西於昧谷禹貢導水於南溟莊躋墟衆而可王既通五尺於鳳秦迄乎漢氏置五郡暨昆明張騫之通西徼諸葛之事南征控八垓於神州闢萬里之煙雲廓瀘江而爲門掘西緬以爲塞接交益而並峙抗崑崙之重扼繁乎蔽陸之所湊族類不減乎中土或炫爛之怪錯奄八區而誰伍於前則跨帶交趾連延南海危聳撐空懸石雲霧溪

汨汨而渚流谷掩掩以伏偃途迷迷乎衡宇瓦萬里而愈遠於後則據躡吐蕃枕騎石門崎嶇跳跌要害之屯北指輶以岷巴復遠御乎隴右背長江以爲壘還九險而錯繆於東則右綿施鬼萬壑所充嵩峻帆突肩鼉柱空涵沃野於千里負天限之關垣引長渠於二廣御風門於辰沅於西則遙制八百控有猛密老撾肢屬干崖附籍皇圖遠攝乎遐陬獫狁馴擾於帝懷恆懇懇以納款又何見乎嵩萊其封城之內則舞陰崇卑雄據千里長林達谷屏嶺重水蓋將自其大者而觀之其山則龍盤鳳翥虎踞蛇伸岡巒拱衛翠壁青青左哀牢右太華陽瓜有天耳之扼隘銀生連鳥蒙以接霞罕尋所嶽之點蒼王褒使祀之金碧靖蛉崇峯修谷成會要之區拓南嶺嶂摩雲爲控扼之邑於是乎竹箭綠瑩楊柳臨岸橘柚抽枝松柏挺幹安羅婆羅之殊其華棠梨楸子之菁其實紫榆杏櫻橙檀杉漆木蘭椿槐櫻李桃梨園桂之覆秋馨霜梅之傳春信乳檀檳櫟而霞騰安息露而雲噴卉則紫花白蓮素馨杜鵑薔薇芍藥芭蕉紫菀青蘭芬芳於幽谷山茶葱鬱於峰巔蔓修藤吐種種奇葩有標其葉有灼其華或經秋而傲霜或蒸日而拂霞爾乃孔羽珮翠鶴頂冠朱雉雉素鸚鵡人呼蛤蚧穿其木鸛鵲鳩其陰實樹巢珊瑚之鳥苔山來鸛鶴之吟鷹隼驚搏鳥鳥反哺白鵲于飛翡翠啄霧子規夜作而促耕燕雀樓暖而春至超迴鳴號戾止乎其內獸則熊羆咆號於深林虎豹長嘯而風烈夕羊畏露狡兔迎月猩猩夜啼猿猴競捷松鼠之攀緣絲鹿之隱穴犀象敞牙豪豬刺簪麝狐假威犛牛踞山脚蹕

乎其間珍則有琥珀丹青玳瑁瑁英金沙銀礦川媚山靈瑪瑙珊瑚絕蘊寶井錫鐵銅鉛石綠碧瑱果則南棗胡桃松實檳榔橄欖栴檀駢根並蒂香橙金橘異族同房或託根於崆峒之陰或萃蔭於圃園之陽其浸則滇池嘉利治水洱澤異龍陽宗之湖撫僊星雲之陂瀝滴涓流會其深決淤剔漢成其大激湫瀦浮空澎湃喧喧百川洗滌塵隘乃若秋月懸波午風轉幌飛沫起濤揚浮溢浪大明當天彩雲蕩漾溟溟濛濛色連霄漢又若瀾滄麗水金沙元江橫襟襟帶山陵懷襄圓淵九迴以懸騰溢流雷响而電揚長江挾渠淺湍崔嵬盤渦谷轉凌濤山顛渾渾淪淪森乍挹乍堆爾乃泄瀉湧鹹於浚井採山煮水於鹽池內帑輸賦巨商擅貴於是乎蛟龍隱灘鼉鼉處水乃見怪物與雲致雨其族則有長鯨吞舟脩鱗吐沫金線竹釘水母蚌蟪江公大頭康郎細鱗鱗鰐鯉鯢鮪鱗鱗蠟螺鱗鰓目蝦噴寬鱗甲錯錯煥爛錦斑沂回順流唼喁沉浮其四野則丘陵墳衍原隰陂渠溝洫吸吟黍稷離池塘既隳高城深池關譏啓析江梁濟水寢廟綿五世之勳巨室端維垣之矩喬木陰陰朱黻靡靡其居民則高門鼎貴魁岸豪岸逸流寓多齊魯之昆戎遺悉吳越之裔其間雖有毒蠱烏蠻鳩獠畧慄惟構巢于巖阿結茅于山脊友麋鹿之與木石竟莫伍于塵市觀郊隩之富奧實京邑之綱紀帝王之外援開國之弘宇斯蓋宅土之所安業觀聽之所溢美此其大較也然此特山川之粗也乃若天有至粹地有至精協氣昭宣名世挺生施全之傳毛詩許叔之授五經張隆之慕擾狐兔楊惠之孝感神明文

章政事蔚若王昇風裁凜然燭若張叔董文彥義以

拒賊死睢陽之忠呂季平誓不附雍茂子卿之獨傳

寶南州人傑仲宣齊名經術張英身代時勉之罪郭

文秀發相如之曲和光道人廉惠先生恥於利祿居

恬政明又若鑒字釋蝌蚪之文笠師精卜數之撰麥

宗通番蠻之書草書綴義之之帖義若用之節若方

圯出將入相若一清守死善道若繼魯廷壁剛直不

阿有澄清當世之志希載博雅修潔達拯溺亨屯之

體近則山嶽炳靈風氣弘啓英俊迭出未可枚舉當

盛世而擅名稍海內而爲擬是游談者之樂譽景行

者之仰止石潭先生喟然嘆曰壯哉吾子其善遊乎

余舊有志於是縱言琅琳實獲我心滌我之沉痾開

我之靈襟奇奇怪怪恍恍奪神而今惜其去子而之

湖荆也演雲子怫然不釋曰石門劍閣三巴綿絡楚

王夢遊之陽臺大禹黑水之流鑿岷峨擬之以舒抱

江潼藉之以披廓物不終聚復云駕言茫然淋淋不

知其然

滇中茶花記

馮時可

茶花最甲海內種類七十有二冬末春初盛開大於
牡丹一畧若火齊雲錦燦日蒸霞南城鄧直指有茶
花百韻詩言茶有十絕一壽經三四百年尚如新植
一枝幹高疎四五丈大可合抱一膚紋蒼潤黯若古
雲氣鱗疊一枝條勁糾狀似麀尾龍形一蟠根輪困
離奇可凭而几可藉而枕一豐葉森沉如幄一性耐
霜雪四時常青一次第開放歷二三月一水養瓶中
十餘日顏色不變直指公有百韻甚工

雲南總部藝文三

送李必雲南伐蠻

唐儲光義

昆明滇滇池蠢爾敢逆常天星耀鐵鎖弔彼西南方

總宰統元戎太守齒軍行囊括千萬里矢謨在廟堂

耀耀金虎符一息到炎荒蒐兵自交趾芟舍出瀘湯

羣山高嶺若凌越如鳥翔封豕驟踰伏巨象遙披攘

迴溪深天淵揭厲踰舟梁元武掃狐城蛟龍除方良

雷靈隨神兵礪猛動穹蒼斬伐若草木繫縲同豕羊

除醜飲瀾河咽歌亂行藏君子惡薄險王師恥重傷

廣車設置梁太白收光芒邊吏靜縣道新書行紀綱

劍閣掉勒歸武弁朝建章龍樓加命服解牙擁秋霜

邦人頌靈旗側聽何洋洋京觀在七德休哉我神皇

賀李必伐蠻歸詩

高適

聖人赫斯怒詔伐西南戎肅穆廟堂上深沉節制雄

遂令感激士得建非常功料死不料敵顧恩寧顧終

鼓行天海外轉戰蠻彝中梯巖近高鳥穿林經毒蟲

鬼門無歸客比戶多南風蜂蟻隔萬里雲雷隨九攻

長驅大浪破急擊羣山空餉道忽已遠懸軍垂欲窮

精誠動白日噴薄連蒼穹野食掘田鼠哺殲兼熨僮

收兵列亭埃拓地彌西東臨事恥苟免履危能飭躬

將星猶照耀邊色何溟濛瀟水夜可涉交州今始通

歸來長安道召見甘泉宮廉蘭若未死孫吳知音同

相逢論意氣慷慨謝深衷

西蕃書

元張翥

西道出印契百里彌箐林俛行不見日刺木鬱蕭森

伏莽有彝獠巢枝無越禽根盤三嶺險氣接西蕃深

銀山雪夏白金沙嵐晝黔主恩界良帥時平靖蠻心

風威所播洒瘴地空毒淫願言闕南微蔽以樹棠陰

送楊耀卿使雲南

李材

飄飄使節出金閨郭隗臺前暫解攜天入五溪無馬

到地經三峽有猿啼千雲舊里風烟在太尉家聲日

月齊明夜客棹何處望秋河迢遞碧雲低

雲南詩

明史公謹

城南雙塔高嵯峨城城北千山如湧波隔斷中原萬餘

里耳邊無處聞絃歌我來正值兵戈後厭聽邊聲出

刁斗壯士沉雄細柳營豈效棘門空趕趕金戈鐵馬

擁雲霧顧爾羣兒如培塿軍中大將漢武侯氣吐虹

霓橫素秋七擒七縱平其酋殺氣慘淡空中收羣氓

赴城出方物蒟醬作馬隨旆牛蠻語休倩若禽鳥笑

聽華言無語曉縱橫跋扈無尊卑隸覺王臣眼中小

回首令人憶中國拔劍高歌倚天立碧雞蒼蒼元氣

溫梁王宮殿爲荆棘鷓鴣朝鳴孤夜集金滿牀頭總

何益不如一醉杏花村濯足昆明看山色

賦得滇池夜月

郭文

長天無雲山四青白月在水搖虛明冷涵萬象鏡光

裏乾坤一色秋冥冥玉壺載酒遊空碧人在清涼水

晶城座中何郎湖海客醉眼却嫌滇水窄飄飄書劍

不可留坐令樂事成離憂安得身如水與月千里萬

里隨君舟

滇南卽事

沐麟

設說滇南俗人民半雜彝管絃春舍早燈火夜街遲

問歲占雞骨禳凶瘵虎皮轎車巡歷處時聽語休偶

入滇

張時微

天邊乘傳客歷險到殊方草長知烽息民流屬歲荒

巖花薰澗壑木葉墮衣裳何事秋風起愁看白髮長
又

山路日多雨我行猶未休碧溪雲不定青草瘴仍浮
客久旌旄落天空鶴鶴秋卜居何以賦長嘯吳鉤

登滇城觀兵

張佳印

城上西風落客衣炎旌木葉未全稀高臺寒並方旄
立列嶂青從埤垠歸壁壘秋聲傳夜柝昆池烽色半
魚磯王師何日收新郡徒倚浮雲止北飛

送黃侍御申按雲南

李舉龍

久矣乘風瘴癘開西南萬里壯遊裁登臺越嶂山形
合攬轡昆明秋色來周禮職方天外盡漢臣封事日
邊迴征蠻幕府今凋落安得樓船下瀨才

送周憲副之雲南

吳國倫

主恩君已三持節益部聲名異日傳漢署共瞻驄馬
使彝荒今上白猿篇嚴旌畫指昆明日憲府秋開越
雋天好見折衝樽俎上近來南國並風煙

送莫文學滇南典試

前人

橫經雅化諸生範捧檄俄趨萬里遊天盡西南標漢
柱山懸金碧護梁州文名却借青氈重國士應同白
璧收不是千金價一顧誰令荒服共驂騑

送段虛舟還滇

嚴清

七載離鄉客思盈那堪兩見故人行剗郎觀裏桃空
發郭隗臺邊草漫繁素志肯遺酬願白頭暫慰倚
門情君歸我滯誰爲伴萬里秋空共月明

滇海曲

楊慎

碧羈金馬古梁州銅柱鉞橋天際頭試問平滇功第
一逢人惟說潁川侯

二 化城樓閣壯人寰澤國封疆鎮兩關雲氣開成銀色
界天工斷出點蒼山

三 沙金海貝出西荒桃竹幢華貢上方香象渡河來佛
子白狼架木拜夷王

四 硯房草閣瞰彝庭側島懸崖控絕陁鷄足已窮章亥
步驚頭空入梵王經

五 湖蕩魚蝦晨積塲市橋燈火夜交光油憲洞戶吳商
肆羅帕封頤雙婦粧

六 蘋香波暖泛雲津漁樵樵歌曲水濱天氣常如二三
月花枝不斷四時春

七 煮海嵯峨暝流沙避風估客夜乘槎雪浮梗稻壓春
酒霞囀檳榔呼早茶

八 海濱龍沛赴春會江曲魚村弄晚霞孔雀行穿鸚鵡
樹錦鸞飛啄杜鵑花

春望 前人

春光先到海東頭春興催人獨上樓最是晚來凝望
處曲堤煙柳似皇州

二 滇海風多不起沙汀洲新綠徧天涯采方亦有江南
意十里春波遠泛花

三 古岸新花金碧叢昆池三百水烟通梁王閣道青蕪
國漁父帆檣白鳥風

寄滇南諸人 平顯

林泉有約共投閒歸伴先生放白鵬昨夜夢魂清化
鶴曼然鳴到碧雞山

寄滇中友人 前人

夢入滇池卷白波蜜檀花發暖風多畫船總載江南
客齊唱吳腔子夜歌

二 春水花明玉案山寶臺螺翠小烟鬟臨臯羽客空長
揖不載清風鶴夢還

滇南七夕歌憶升庵楊公因寄 井序 朱曰藩

予少日遊滇南見其土風每歲七夕前半月人家
女郎年十二三以上者各分曹相聚以香水果

爲供連臂踏歌乞巧於天孫詞甚哀婉暇日因採
其意爲滇南七夕歌三首末首有懷升庵楊公因

併系之曹子桓云爾獨何事限川梁悲夫誰則爲
動念哉

一宵爭抵一年長猶度金針到綉牀天下眞成長會
合昆明池上兩鸞鸞

二 綵袖飛來山上山小樓金馬墮雲鬟奈花滿地無人
掃二十年前菩薩蠻

三 錦窠何必奪丘遲畢竟還他蜀錦奇近日錦官空擅

巧博南山下乞蠻姬

昆明池歌

顧應祥

昆明池延袤數百里千山萬山直自崑崙來諸山之
水匯於此相傳其水顛倒流滇池之名由此始左有
金馬山右有碧雞峯瀾漫浩瀚渺無際但見洪濤巨
浪日夕排蒼空青天忽驚白日起霹靂振撼蛟龍宮
天吳水怪九首八足不可以名狀時復出沒於其中
有時風恬波浪息一碧萬頃開青銅其廣也如此胡
爲乎不在九域之內不得與五湖七澤相爭雄神禹
治水迹不到穆王八駿難爲窮漢主鑿池徒矜誇王
褒將命何匆匆唐宋以來各僭據聲教不與中國通
天開景運聖人出一掃海內羣邪空五服之外更五
服俯首受命歸提封休偕惟結之類吾不知其幾千
萬種禮樂不異車書同渺余生當全勝日觀風雨度
乘青聰古來多少豪傑士局於偏安之世不得一洗
瑰磊曾百年過眼一彈指得此勝覽真奇逢振衣獨
立太華頂狂歌目斷孤飛鴻

雲南總部紀事

史記西南夷傳始楚威王時使將軍莊蹻將兵循江
上略巴蜀黔中以西莊蹻者故楚莊王苗裔也蹻至
滇池地方二百里旁平地肥饒數千里以兵威定屬
楚欲歸報會秦擊奪楚巴黔中郡道塞不通因還以
其衆王滇變服從其俗以長之

武帝元狩元年博望侯張騫使大夏來言居大夏時
見蜀布邛竹杖使問所從來曰從東南身毒國可數
千里得蜀賈人市或聞邛西可二千里有身毒國焉

因盛言大夏在漢西南慕中國思何如隔其道誠通
蜀身毒國道便近有利無害於是天子乃令王然于
柏始昌呂越人等使問出西夷西指求身毒國至滇
滇王嘗羌乃謂爲求道西十餘輩歲餘皆聞昆明莫
能通身毒國滇王與漢使者言曰漢孰與我大及夜
郎侯亦然以道不通故各自以爲一州主不知漢廣
大使者還因盛言滇大國足事親附天子注意焉及
至南越反上使馳義侯因犍爲發南夷兵且蘭君恐
遠行旁國虜其老弱乃與其衆反殺使者及犍爲太
守漢乃發巴蜀罪人嘗擊南越者八校尉擊破之會
越已破漢八校尉不下卽引兵還行誅頭蘭頭蘭常
隔滇道者也已平頭蘭遂平南夷爲牂柯郡夜郎侯
始倚南越南越已滅會還誅反者夜郎遂入朝上以
爲夜郎王南越破後及漢誅且蘭平君并殺犍侯冉
駟皆振恐請臣置吏頭蘭卽且蘭也

元封二年上使王然于以越破及誅南夷兵威風論

滇王入朝滇王者其衆數萬人其旁東北有勞浸靡
莫皆同姓相扶未肯聽勞浸靡莫數使犯使者吏卒

元封二年天子發巴蜀兵擊滅勞浸靡莫以兵臨滇

滇王始首善以故弗誅滇王難難西南夷舉國降請
置吏入朝於是爲益州郡賜滇王王印復長其民

西南夷君長以百數獨滇小邑最寵焉

後漢書西南夷傳滇王者莊蹻之後也元封二年武
帝平之以其地爲益州郡割牂柯越嶲各數縣配之

後數年復并昆明地皆以屬之此郡有池周回二百
餘里水源深廣而末更淺狹有似倒流故謂之滇池
河土平敞多出鸚鵡孔雀有鹽池田漁之饒金銀畜

產之富人俗豪快居官者皆富及累世

成帝河平中夜郎王興與鉤町王禹漏臥侯俞更舉
兵相攻牂柯太守請發兵誅興等議者以爲道遠不
可擊乃遣大中大夫蜀郡張匡持節和解興等不從
大將軍鳳於是薦金城司馬陳立爲牂柯太守立者
臨邛人前爲連然長不韋令蠻夷畏之及至牂柯論
告夜郎王興與不從命立請誅之未報乃從吏數十
人出行縣至興國且同亭召興與將數千人往至亭
從邑君數十人入見立立數責因斷頭邑君曰將軍
誅亡狀爲民除害願出曉士衆以興頭示之皆釋兵
降鉤町王禹漏臥侯俞震恐入粟千斛牛羊勞吏士
立還歸郡興妻父翁指與興子邪務收餘兵迫脅旁
二十二邑反至冬立奏募諸夷興都尉長史分將攻
翁指等翁指陳阨爲壘立使奇兵絕其饒道縱反間
以誘其衆都尉萬年曰兵久不決費不可共引兵獨
進賊走趨立營立怒叱賊下令格之都尉復還職立
引兵救之時天大旱三攻絕其水道蠻夷共斬翁指
持首出降漏臥夷邑名後爲縣

王莽篡位改漢制貶鉤町王以爲侯王郡怨恨牂柯
大尹周欽詐殺郡弟承攻殺欽州郡擊之不能服
三邊蠻夷愁擾盡反復殺益州大尹程降莽遣平蠻
將軍馮茂發巴蜀健爲吏士賦斂取足於民以擊益
州出入三年疾疫死者什七巴蜀擾動莽徵茂還誅
之史遣寧始將軍廉丹與庸部牧史熊大發天水隴
西騎士廣漢巴蜀健爲吏民十萬人轉輸者合二十
萬人擊之始至頗斬首數千其後軍糧前後不相及
士卒饑疫三歲餘死者數萬而粵嶺蠻夷任貴亦殺

太守枚根自立爲叩穀王會莽敗漢與誅貴復舊號云

公孫述時大姓龍傳尹董氏與郡功曹謝通保境爲漢乃遣使從番禹江奉貢光武嘉之並加褒賞

王莽亂政益州郡夷棟蠶若豆等起兵殺郡守越嵩姑復夷人大牟亦皆叛殺略吏人莽遣寧始將軍廉丹發巴蜀吏人及轉兵穀卒徒十餘萬擊之吏士饑疫連年不能克而還以廣漢文齊爲太守造起陂池開通灌漑墾田二千餘頃率厲兵馬修障塞降集羣夷甚得其和及公孫述據益上齊固守拒險述拘其妻子許以封侯齊遂不降聞光武即位乃間道遣使自聞蜀平徵爲鎮遠將軍封成義侯於道卒詔爲起祠堂郡人立廟祀之

王莽時越嶲郡守枚根調叩人長貴以爲軍候更始二年長貴率種人攻殺枚根自立爲叩穀王領太守事又降於公孫述述敗光武封長貴爲叩穀王

王莽篡亂氏人亦叛建武初氏人悉附隴蜀及隗囂滅其酋豪乃背公孫述降漢隴西太守馬援上復其王侯君長賜以印綬後囂族人隗茂反殺武都太守氏人大豪齊鍾雷爲種類所敬信服諸豪與郡丞孔奮擊茂破斬之後亦時爲寇盜郡縣討破之

建武十八年夷渠帥棟蠶與姑復樓楡棟連然滇池建憐昆明諸種反叛殺長吏益州太守繁勝與戰而敗退保朱提十九年遣武威將軍劉尚等發廣漢犍爲蜀郡人及朱提夷合萬三千人擊之尚軍遂渡瀘水入益州界羣夷聞大兵至皆棄輿奔走尚獲其羸弱穀畜二十年進兵與棟蠶等連戰數月皆破之

明年正月追至不韋斬棟蠶帥凡首虜七千餘人得生口五千七百八人馬三千匹牛羊三萬餘頭諸夷悉平

通志諸葛亮南征嘗撫琴滇人有願學者乃著琴經一卷述琴之始及七絃十三徽之音意於是滇人始知琴

諸葛亮入南中從征者冬暮思歸乃各與一磚曰臥枕此即抵家從之果然不用命者終莫能歸又嘗用炊釜自隨不炊自熟以防不時之需

雲南志略蜀建興三年諸葛亮南征聞孟獲爲夷漢所服募生致之凡七縱七擒獲曰公天威也南人不復反矣諸部悉平亮即其渠帥而用之或以諫亮亮曰若雷外人而無兵必成禍患今吾欲不雷兵運糧紀綱初定夷漢初安於是悉收豪傑以爲官屬出其金銀丹漆牛馬以給軍國用終亮之世夷不復反

晉書王遜傳惠帝末西南夷叛寧州刺史李毅卒城中百餘人奉毅女固守經年永嘉四年治中毛孟詣京師求刺史不見省孟固陳曰君亡親喪幽閉窮城萬里訴哀不垂愍救既慙包胥無哭秦之感又愧梁妻無崩城之驗存不若亡乞賜臣死朝廷憐之乃以遜爲南夷校尉寧州刺史使於郡便之鎮遜與孟俱行道遇寇賊踰年乃至外逼李雄內有夷寇吏士散沒城邑丘墟遜披荒糾厲收聚離散專仗威刑鞭撻殊俗遜未到州遠羣童聯爲秀才建寧功曹周悅謂聯非才不下版檄遜既到收悅殺之悅弟潛謀殺遜以前建寧太守趙混子濤代爲刺史事覺並誅之又誅豪右不奉法度者數十家征伐諸夷俘馘千計獲

馬及牛羊數萬餘於是莫不振服威行寧土又遣子澄奉表勸進於元帝帝嘉之累加散騎常侍安南將軍假節校尉刺史如故賜爵侯中縣公遜以地勢形便上分牂柯爲平夷郡分朱提爲南廣郡分建寧爲夜郎郡分永昌爲梁水郡又改益州郡爲晉寧郡事皆施行

雲南志略齊末平中以陳顯達爲益州都督顯達一目獠人慢之顯達遣使責其租稅僚帥曰兩目刺史尚不能調況一目耶遂殺其使顯達分遣將帥聲言出獵夜往襲之無少長盡殺之蠻僚震服梁武帝大同三年武陵王紀都督益州先是蜀亂建寧越嶺之地累朝不能有至紀開越嶺通建寧貢獻方物十倍前人以焚瑋爲南寧州刺史

通志隋開皇中史萬歲擊南寧行數百里見諸葛亮紀功碑銘其背曰萬歲之後勝我者過此萬歲今左右倒其碑跌志曰萬歲不應仆吾碑萬歲駭重立其碑而進雲南志略隋開皇中以史萬歲征南蠻蠻皆降師還復叛蜀王秀奏萬歲貪賂致生邊患萬歲以罪廢乃以梁毗爲西寧州刺史諸酋相率以金遺毗毗量金坐側對之慟哭曰此物饑不可食寒不可衣汝等以此相殘何爲今將此來欲殺我也耶一無所取蠻酋大悅

初蠻酋張氏名仁果漢末居蒙舍川爲在諸部之南故曰南詔詔漢語國君也傳至樂進永爲蒙氏所滅蒙氏名細奴邏城蒙舍龍之子圖而都之國號大蒙自稱奇王雲南建國稱王始此唐貞觀三年也

羅皮始得意於六詔蒙氏居蒙舍川號蒙舍詔施望大據石和城號施浪詔豐咩提遼朕川號遼朕詔豐時據浪穹號浪穹詔波衝據越析川號末些詔輔原羅探越揭號蒙揭詔是為六詔

皮羅閣賂劍南節度使王昱求合六詔朝廷從之封大酋帥越國公雲南王賜名歸義盡有雲南之地自是以後不可復制皮羅閣禪其子閣羅鳳是為武王改元曰建鍾雲南改元始此

閣羅鳳妻女嘗謁都督張度陀度陀皆通之且多求乞閣羅鳳不勝其忿遂發兵反攻陷姚州殺度陀唐以劍南節度使鮮于仲通將兵八萬討之蒙使行成弗許及戰仲通大敗僅以身免閣羅鳳乃結和吐蕃刻石於龍尾閣明其不得已叛唐之意天寶十三年劍南留後李密將兵七萬致討閣羅鳳誘之全軍以沒唐益發兵竟不克前後死者二十餘萬人

異牟尋立制清平官以下十司給服祿徒都其咩城封點蒼山為中岳遣烏蠻鬼主孟衡貢來朝復臣於唐與劍西南節度使韋皋連兵伐吐蕃大破之取鐵橋等二十五城

太和二年蠻有學書子弟在成都者盡得蜀之虛實蒙遣清平官蒙其顛大舉入寇取邛成戎雋三州遂入成都掠子女百工數萬人南歸

世隆立始僭帝號改元建極世隆自將侵蜀遂破成都自是大渡河以南盡屬蒙矣
宋太祖建隆三年王全斌克蜀欲因取雲南太祖止之曰德化所及蠻自悅服何在用兵於是開邊之變始息

通志投素與宋慶曆中嗣位性好狎遊廣營宮室於春登堤上多種黃花名邊道金稜雲津橋上多種白花名紫城銀稜每春月必挾妓載酒自玉案三泉迴為九曲流觴男女列坐園草簪花以花盤髻上為飾金花中有素馨香以素與最愛故名又有花遇歌則開有草遇舞則動素與令歌者傍花舞者傍草後以荒逸失國

宋寧宗嘉定十七年元太祖帖木真征東印度至鐵橋石門關前軍報有獸一角形如鹿而馬尾色綠作人言曰汝主宜早還左右皆憚獨耶律楚材曰此名角端蓋旄星之精能四方言語好生惡殺聖人在位則斯獸奉書而至且能日馳萬八千里靈異如鬼神不可犯也帝即回馭石門關在麗江府東印度蓋指南詔也

元史賽典赤贈思丁傳太祖西征贈思丁率千騎迎降命入宿衛從征伐以賽典赤呼之而不名十一年帝謂賽典赤曰雲南朕嘗親臨比因委任失宜使遠人不安欲選謹厚者撫治之無如卿者賽典赤拜受命退朝即訪求知雲南地理者書其山川城郭驛舍軍屯夷險遠近為圖以進帝大悅遂拜平章政事行省雲南賜鈔五十萬緡金寶無算時宗王脫忽魯方鎮雲南惑於左右之言以賽典赤至必奪其權具甲兵以為備賽典赤聞之乃遣其子納速刺丁先至王所請曰天子以雲南守者非人致諸國背叛故命臣來安集之且戒以至境即加撫循今未敢詣願王遣一人來共議王聞遂罵其下曰吾幾為汝輩所誤明日遣親臣撒滿位哈乃等至賽典赤問以何禮見對

曰吾等與納速刺丁偕來視猶兄弟也請用子禮見皆以名馬為贊拜跪甚恭觀者大駭乃設宴陳所賜金寶飲器酒罷盡以與之二人大喜過望明日來謝語之曰二君雖為宗王親臣未有名爵不可以議國事欲各授君行省斷事官以未見王未敢擅授令一人還先稟王王大悅由是政令一聽賽典赤所為雲南俗無禮儀男女往往自相配偶親死則火之為喪祭無稅稻桑麻子弟不知讀書賽典赤教之拜跪之節婚姻行媒死者為之棺槨奠祭教民播種為陂池以備水旱創建孔子廟明倫堂購經史授學田由是文風稍興雲南民以貝代錢是時初行鈔法民不便之賽典赤為聞於朝仍許其俗又患山路險遠盜賊出沒為行者病相地置鎮每鎮設土酋吏一人百夫長一人往來者或值劫掠則罪及之有土吏數輩怨賽典赤不已用至京師誣其端偕數事帝顧侍臣曰賽典赤愛國愛民朕洞知之此輩何敢誣告即命械送賽典赤處治之既至脫其械且諭之曰若曹不知上以便宜命我故訴我端偕我今不汝罪且命汝以官能竭忠自贖乎皆叩頭拜謝曰某有死罪平章既生之而又官之誓以死報賽典赤居雲南六年至元十六年卒年六十九百姓巷哭葬都蘭北門交趾王遣使者十二人齊經為文致祭其辭有生我育我慈父慈母之語使者號泣震野帝思賽典赤之功詔雲南省臣盡守賽典赤成規不得輒改

納速刺丁傳納速刺丁累官中奉大夫雲南路宣慰使都元帥至元十六年遷帥大理以軍抵金齒蒲驃曲蠟緬國招安彝寨三百籍戶十二萬二百定租賦

置郵傳立衛兵歸以馴象十二人貢有旨賞金五十兩衣二襲麾下士賞銀有差會雲南省臣於諸彝失撫綏之方世祖憂之近臣以納速刺丁爲言十七年授雲南行中書省左丞尋陞右丞建言三事其一謂雲南省規措所造金薄貿易病民宜罷其一謂雲南有省有宣慰司又有都元帥府近宣慰司已奏罷而元帥府尚存臣謂行省既兼領軍民則元帥府亦在所當罷其一謂雲南官員子弟入質臣謂達官子弟當遣餘宜罷奏可

張立道傳皇子忽哥赤封雲南王往鎮其地詔以立道爲王府文學立道勸王務農以厚民即署立道大理等處勸農官兼領屯田事佩銀符王薨召入朝領大司農事中書以立道熟於雲南奏授大理等處巡行勸農使佩金符其地有昆明池介碧雞金馬之間環五百餘里夏潦暴至必冒城郭立道求泉源所自出役丁夫二千人治之洩其水得壤地萬餘頃皆爲良田饑饉之人雖知蠶桑而未得其法立道始教之飼養收利十倍於舊雲南之人由是益富庶羅羅諸山蠻慕之相率來降收其地悉爲郡縣十五年除忠慶路總管佩虎符先是雲南未知尊孔子祀王逸少爲先師立道首建孔子廟置學舍勸士人子弟以學擇蜀士之賢者迎以爲弟子師歲時率諸生行釋菜禮人習禮讓風俗稍變矣行省平章賽典赤表言於朝有旨進官以褒之

十七年立道爲臨安廣西道宣撫使兼管軍招討使仍佩虎符陞辭賜以弓矢衣服鞍馬始赴任會禾泥路大首領必思反扇動諸蠻亟發兵討之拔其城

邑鼓行而前徇金齒甸七十城越麻甸抵可蒲皆下之有遺以馴象金鳳異物者悉獻諸朝二十二年又籍兩江農士貴族從殺李維屏所部戶二十五萬有奇以其籍歸有司遷臨安廣西道軍民宣撫使復創廟學於建水路書清白之訓於公廨以警貪墨風化大行

世祖本紀正月丁卯建都王烏蒙及金齒一十二處俱降建都先爲緬所制欲降未能時諸王相吾答兒及行省右丞太卜參知政事也罕的斤分道征緬於阿昔阿禾兩江造船二百艘順流攻之拔江頭城令都元帥袁世安戌之遂遣招諭緬王不應建都太公城乃其巢穴遂水陸並進攻太公城拔之故至是皆降

至元二十九年春正月丙申雲南行中書省言羅甸歸附後改善定府隸雲南省三十餘年今期羅甸實慰安撫司隸湖南省不便乞罷之仍以其地隸雲南省制曰可

成宗本紀十二月戊戌立徹里軍民總管府雲南行省臣言大徹里地與八百媳婦犬牙相錯今大徹里胡念已降小徹里復占扼地利多相殺掠胡念遣其弟胡倫乞別置一司擇通習蠻夷情狀者爲之帥招其來附以爲進取地詔復立蒙樣剛等甸軍民官仁宗本紀夏四月壬辰中書省臣言雲南土官病故子姪兄弟襲之無則妻承夫職遠方蠻夷頑獷難制必任土人可以集事今或闕員宜從本俗權職以行制曰可

以土官昭練爲宣慰使都元帥又置臨江元江等處宣慰司兼管軍萬戶孟定路孟官路並爲軍民總管府秩從三品者線蒙慶甸銀沙羅等甸並爲軍民府秩從四品孟併孟廣者樣等甸並設軍民長官司秩從五品四月癸巳雲南威楚路之蒲蠻猛吾來朝貢願入銀爲歲賦詔爲置散府一及土官三十三所皆賜金銀符

研北雜志天曆初雲南大擾武昌運米至八番一石用楮幣一千五百貫

通志元馮夢弼爲雲南宣慰司令史嘗因公差抵一站日暮站吏止行問其故閉目搖手不敢言馮怒不從夜行至大溪忽見一物如屋烏刺赤下馬踟躇若告訴狀呼問何物亦閉目搖手不敢言馮乃下馬視之其物轉入溪中腥風臭霧觸人口鼻比曙前站吏驚曰今夜馬判上岸麻線何以得過問馬判何物曰螞蝗精也後夢弼官至禮部尚書方言官人曰麻線站役之牧馬者曰烏刺赤

明廬陵郭子章撫黔一日中夜其夫人脫子章問曰猛廷瑞何人子章大咤曰爾婦人安知猛廷瑞且中夜問何爲夫人曰適夢有人粧束如廟中金甲神來喝云我猛廷瑞也過此欲見中丞不得近故來謁夫人耳章曰汝盍問其所由來夫人曰吾固問之渠云吾爲陳巡撫冤死訴帝得請今歸耳章心異之不敢語人逾月而用寶被逮之報至

永平民有受值爲人傭作者以他役逾期不赴主人怒而逐之哀求不納哭而去曰去則母無以食奈何行未幾倦臥道旁夢一人撫其背曰無傷也某山之

原有竹誠往攀而搖之可得米以養覺而憶其山舊遊也往之竹下果得米於時明萬曆庚寅辛卯間也滇中一時所在皆有之晉車楊全太守時爲司徒郎出差歸里及入京攜以饋其米非稻非麥長三倍稻米作粥不稠濁爲飲潤而甘微帶香味

雲南總部雜錄

山海經西南黑水之間有都廣之野后稷葬焉爰有膏粟膏稻膏黍膏稷百穀自生

神異經西南裔外老壽山爲宮以黃銅爲牆

後漢書西南夷傳西南夷者在蜀郡徼外有牂昆明諸落西極同師東北至葉榆地方數千里無君長辯

髮隨畜遷徙無常自檣東北有作都國東北有冉駹國或土著或逐畜遷徙自冉駹東北有白馬國氏種是也此三國亦有君長

華陽國志南方有布芾竹長百丈圍三丈餘可爲大舟筍味甚美

博物志雲南郡出茶首其音爲蔡茂兩頭鹿也以四月中取其胎可治蛇毒永昌間有之

魏宏南中志雲南郡有點蒼山上有神鹿一身兩頭

專食毒草名食毒鹿

水經注溫水西逕昆澤縣南又逕味縣故滇國都也諸葛亮討平南中劉禪建興元年分益州郡置建寧郡於此水側皆是高山山水之間悉是木耳夷居

語言不同嗜欲亦異雖曰山居土產平和而無瘴毒溫水又西南逕滇池於西北池周三百里許上源深廣下流淺狹似如倒池故曰滇池也長老傳下流淺言池中有神馬家馬交之則生駿駒日行五百里晉太元十四年寧州刺史費統言晉寧郡滇池縣兩神馬一白一黑盤戲河水之上有滇州元封三年立益州郡治滇池劉禪建寧郡治也

寰宇記滇池黃洋江有大蛇名曰青葱好食人又有大蛇伺鹿過盤繞而吞之吞畢復繞樹其角骨鑽皮而出蛇瘡甚殆死瘞更吞之

震澤紀聞初安南之北雲南之南爲八百車里老撾木邦諸彝有孟密者舊屬木邦木邦有女名囊罕弄嫁之孟密其父愛之盡以寶井賸焉孟密以是日富

強與木邦相攻兩家俱訟於朝孟密以寶貨賂二萬自兵部諸津要多受其賄者安草勅遣都御史程宗

往按其事有可分分之語宗覆奏如安指於是孟密得立爲安撫司宗盡以所侵木邦地畀之而木邦勢

寢弱反出其下雲南之患由此起至今爲梗云

雪濤談叢滇省風俗每年於六月二十八日各家俱

束草爲葦高七八尺凡兩樹置門首遇夜炳燎其光

燭天是日各家俱用生肉切爲膾調以醢蒜不加烹

低名曰喫生總稱曰火節問其故謂弔忠臣王禕留

此記蓋爲受命入滇說元梁王降王反殺禕醢其肉

若爾則柄槩可也奚忍食生爲耶夫楚人競舟弔屈

子也晉人禁烟傷介推也皆有不忍之意焉王公被

醢而滇俗斫膾喫生毋乃倒置乎存炳火葦食生可

也

圖書編古梁州之南境爲徼外夷地漢置益州郡領於益州部刺史自唐至宋爲蒙氏段氏所據元置雲南諸路行中書省及肅政廉訪司於中慶又置曲靖等處宣慰司於曲靖臨安等處宣慰司於臨安大理金齒等處宣慰司都元帥府於金齒本朝置雲南等處承宣布政使司都指揮使司提刑按察司並治於雲南府云

魏明帝時昆明國貢獻金鳥鳥出燃洲形如雀而色

黃羽毛柔密常吐金屑如粟此鳥畏寒乃處以辟寒

臺宮中爭以鳥吐之金飾釵佩故宮人相嘲曰不服

辟寒金那得聖人心

黃龍元年越嶲之南獻背明鳥於吳形如鶴止不向

南巢常向北多肉少毛聲音百變聞鐘磬笙竿之聲

則奮翅搖頭時以爲祥吳人訛呼爲背亡人以爲不

及百年當有喪亂之事後此鳥不知所往

越嶲國有牛割取其肉牛不死經月如故

犀生越嶲以陷半取之每殺震雷暴雨梁祚魏國統

云西南有異犀三角夜行如炬照數百步或時脫角

則藏於深密處不令人見王者貴其異以爲簪能消

除凶逆

昔有人耕於麗江之野忽有雨暴至捲入龍潭至今

或見其人及牛犁旋繞其中

洱河八月望夜有珊瑚出水而漁人往往見之世傳

海龍獻寶

通志當洱水初洩時林藪蔽翳人莫敢往有二鶴日

從河岸行人尾其跡始得平地故大理又名鶴拓今

南橋作雙鶴示不忘也

姚安東一里許昔蒙氏時有女於此牧羊一羝餽土驅之不去掘地遂得清泉名曰白羊井人即其地立聖母祠及開橋頭井得石羊云即餽土之羝後歸於聖母祠其井即白鹽井也

景東蒙化山多有瘴西至末昌始甚澗滄潞江水皆深絲不時紅烟浮其面日中人不致渡瘴起以春未止於秋杪夾堤草頭相交結不可解名交頭瘴時則行旅皆絕江岸居民多黃瘡早死惟婦女不染也澗滄江在順寧東南四十里歲五六月江中有物色如霜光如火聲如析木破石觸之則死或云瘴母文選謂之鬼彈內典謂之禁水此惟江邊有之郡治絕無

雲南總部外編

通志大理古初國屬天竺水居陸之半為羅刹所據好咲人有張敬者為巫祝羅刹憑之一日老僧自西方來敬家託言欲求地祇修敬以告羅刹問需幾許僧身披袈裟手牽一犬指曰但欲吾袈裟一展犬一跳之地羅刹諾僧曰既許合立符券遂就洱水岸畫券石間於是僧展袈裟縱犬一跳已盡羅刹之地羅刹失措欲背盟僧以神力制之不敢背但問何以處我僧曰別有殊勝之居因於蒼山上陽溪化金屋寶

所一區羅刹喜盡移其屬入焉山遂閉僧乃鑿河尾洩水之半是為天生橋至今洱水島上有赤文如古篆籀云是買地券

周宣王時西竺有國曰摩揭提王曰阿育生三子長福邦次弘德季至德王有神駿一其色如金三子皆欲之王意欲與季而患其爭乃以轡私授至德縱驥東馳命三子曰捕獲者主之三子各部眾追至滇池上長子意馬飲滇池伺而邀之不獲仲子意馬至甸中亦不獲至德追至東山松林以轡邀之馬見轡而就遂獲焉王思遠遠恐不得歸還舅氏神明統兵以援將歸哀牢彝阻道不返既歿福邦為碧雞山神弘德為巖頭山神至德為金馬山神今安寧有龍馬跳澗山並草溪井龍馬河即其所經之地石上蹄跡深尺許

哀牢彝蒙迦獨一曰抵牢宜捕魚死江中其妻沙壺哭之哀觸浮木書浣絮其上若有感因懷妊十月產十男一日往江邊浮木化為龍水上語沙壺曰若為我生子今安在九子怖而走惟季子不去背龍坐龍因舐其背彝語謂背為九謂坐為陸因名子曰九隆其十子曰肩附羅曰牢宜廉曰牢宜諾曰牢宜酬曰牢宜篤曰牢宜託曰牢宜林曰牢宜領曰牢宜閃九隆長而黠驚嘗有天樂奏鳳凰樓五色花開之祥眾遂推為酋長時哀牢山下有奴波息者生十女九隆弟兄娶之厥後種類蔓延分據豁谷是為六詔之始

省城沙浪里有龍湫相傳龍昔出遊變形為人委其鱗甲於石間有賈人憑石上見甲冑一具如龍鱗乃

服之忽腥風起湫中水族迎之而入有頃龍至覓其甲不得走入水中水族不能辨相率拒之賈遂為龍據其湫鄉人識之呼為貨郎龍

唐時楊都師創洱河東羅筌寺寺前有田四十畝每栽秧約三日傭者戲師曰若能繫日當為畢栽師默念呪田栽既畢而日方曠傭歸始知已歷二晝矣山下有黑龍常作風浪覆舟師以白犬吠之龍怒而出師視龍蜿蜒若救誨之有頃龍馴悅而去先是河浪九疊師以念珠鞭之去其三疊河乃翕順可舟

唐末微間有一老僧美髯戴赤蓮冠衣袈裟持鉢至蒙舍細奴邏家乞食時邏父子耕巍山下姑婦往餉見僧乞食遂食之再炊往餽僧坐不去持鉢中道僧已先在復向乞食姑婦驚怪又食之返而復炊持鉢具至巍山則見僧坐磐石前有青牛左有白馬朱甌右有白象各馴伏上覆雲氣雲中有二童子一執鉄杖於左一執金鏡於右姑婦驚喜再供之僧問何所願二女不知僧曰奔葉相承二女趨奴邏等至則但見五色雲中一人持鉢而坐彷彿見二童子唯餘磐石上衣痕及象馬牛之跡

唐時漁人於洱河岸得鴈遺卵收之有頃卵破出嬰兒漁人驚異不敢加害嬰兒能食即解種種伎倆長而為僧居崇模莊人呼為崇模師能呼致風雨驅役鬼神指使如意又能以符呪化水石為酒食千百人皆醉飽南詔憚之師輒化為鴈飛集高真寺不知所終

南詔豐祐之女進香崇真寺歸至城西見乘白馬人擲去尋之不得王告於僧贊陀曰此山神也乃設燈

縣之果在蒼山下僧怒欲行法移山於河神懼願獻珍寶王從之

南詔蒙遜晟時有一僧持錫杖鉢盂牽一白犬乞食開南郡窮石村村素有盜善殺人僧犬爲其盜食僧曰汝村盜吾犬村中罵僧爲誣僧乃呼犬犬遂嗥於衆人之腹中衆謂妖執而殺之解其支體須臾復生謂衆人曰人不可殺死必有生衆爲讎對衆仍斬之更復生又殺之焚其骨爲灰盛以截竹棄之江心須臾僧裂竹而出形體復完執柳瓶著屨履向山而去村主王樂等走馬追之不及射之箭落皆變蓮花始稽首伏罪村衆自是棄刀弓務農業今洱河東有上滄湖產蓮花菜是其跡也

省中相傳昔有人素貧困遇蒼山神授以異術忽生肉翅能飛一日至南詔宮攝其女入玉局峰爲夫婦凡飲食皆能致之後問女安否女云太寒耳其人聞河東高僧有七寶袈裟飛取而還僧覺以法力制之遂溺水中女望不至憂鬱而死其精氣化爲雲條起條落若探望之狀此雲一出洱河中即有雲應之颶風旋起舟遇即覆人戒停泊俗又呼爲無渡雲

五代時趙善政居浪穹天馬山下其山左澗有水右澗無水有樵青神者善鬼法衆樵謂之曰若能分水於右澗乎青神曰不難遂以斧柯觸右澗水湧出與左澗均人居在右者咸利之遺跡尚存

明太祖方有睿謨尚未發童子即謠於道窮究之云有老人泄其事老人蓋復湖土地也上怒謫雲南憑於昆明進耳山寺中祈夢多驗人比於閩之九鯉

欽定古今圖書集成方輿彙編職方典

第一千四百五十七卷目錄

雲南府部彙考一

雲南府建置沿革考

雲南府疆域考 有圖 形勝附

雲南府星野考

雲南府山川考一

職方典第一千四百五十七卷

雲南府部彙考一

雲南府建置沿革考

本府

通志

唐虞爲南交昧谷之交夏商爲梁州域周合梁

於雍國曰鄯闡戰國屬楚號滇國漢武帝置益

州郡東漢仍之蜀漢改建寧郡晉分益州置寧

州李特據蜀屬漢州後晉滅蜀復有其地隆安

初又立晉寧郡宋仍爲寧州齊爲寧州鎮梁陳

均爲寧州隋置昆州唐武德初置南寧州尋改

置雲南郡麟德初置姚州都督府開元末皮邏

閣併六詔爲一遂稱南詔後置十賧以雲南爲

雲南賧貞元中尋內附太和中復叛改爲善闡

府至宋爲段氏竊據元初置善闡萬戶府至元

中改中慶路明改爲雲南府領州四縣九

皇清因之康熙八年裁歸化縣入呈貢縣裁三泊縣

入昆陽州領州四縣七

昆明縣 附郭

漢滇池縣地隋昆州地唐晉寧縣地元初置二

千戶所改置善州領昆明官渡二縣後廢州尋

又併官渡總爲一縣明昆明縣

皇清因之康熙二十六年裁左右中前後五衛及廣

南衛分境屯賦併縣

富民縣

唐初爲西寧州地貞觀中改西寧曰黎州號黎

漢甸元至元初立千戶所後改富民縣明富民

縣

皇清因之康熙二十六年裁右衛分境屯賦併縣

宜良縣

唐爲囉裏籠貞觀中置匡州領匡川等縣元初

立宜良及大池千戶所至元中改置宜良州領

大池大赤二縣後改州爲縣併二縣入焉明宜

良縣

皇清因之康熙五年裁宜良所二十六年又裁左前

中後四衛分境屯賦併縣

嵩明州

戰國楚滇國地爲烏蠻車氏等所居後爲枳氏

所奪故名枳檀漢立長州建金城阿葛二城因

築臺與蠻盟故曰嵩盟唐蒙氏置長州郡宋段

氏改嵩盟郡元初立嵩明萬戶府至元中改爲

長州尋陞爲嵩明府後改爲州領楊林邵甸二

縣明洪武中省邵甸縣成化中省楊林縣俱併

入州更置爲明

皇清因之康熙二十六年裁左右中前後廣六衛楊

林木密鳳梧三所分境屯賦併州

晉寧州

漢滇池縣地晉隆安初置晉寧州唐武德初置

晉寧縣後蒙氏段氏皆爲陽城堡部元初立陽

城堡萬戶府至元中復置晉寧州明以歸化呈

貢二縣隸焉

皇清因之康熙八年裁歸化併入呈貢康熙二十六

年裁左右中前後廣六衛分境屯賦併州

呈貢縣

漢有故城曰最貢世爲烏白些門些莫徒阿茶

焚五種蠻所居元初立呈貢千戶所至元中改

爲最貢縣明改爲呈貢縣

皇清因之康熙八年裁歸化縣入焉康熙二十六年

裁左前廣中四衛分境屯賦併縣

安寧州

戰國楚滇國螳螂川地漢益州郡之連然縣晉

屬建寧郡隋屬昆州唐武德初置安寧縣隸昆

州宋段氏以高氏守之元初隸陽城堡萬戶府

至元初立安寧千戶所後改爲安寧州明安寧

州

皇清因之康熙五年裁安寧所康熙二十六年又裁

左前右三衛分境屯賦併州

羅大縣

唐烏蠻羅部所居宋大理高白連慶治其地元

至元中置羅大州隸中慶路後改爲縣屬安寧

州明弘治十二年改屬雲南府

皇清因之康熙二十六年裁右後二衛分境屯賦併

縣

雲南府疆域圖

馬龍州界

界州甸尋

界府定武

楚雄府界

